

summum intra quinquennium perit.] Talis sanè ab initio Rauenna fuit, sed posterioribus sæculis paludibus exsiccat, huic circumquaque campi maxime fructiferi, hortisque culti adiacentes videntur. Hanc Augustus amplissimo portu altissimaque pharo nobilitauit, vt ^a Suetonius testatur. Muris postea nouis circumdedit Claudius Imperator, vt videre est in hoc titulo portæ marmoreæ, quam auream vel speciosam, ob Architecturæ & ornamentorum pulchritudinem vulgus appellat.

[TI. CLAVDIVS DRVSI. F. CÆSAR. AVG. GERMANICVS PONT. MAX. TR. POT. COS. II. DES. III. P. P. DEDIT.] Rauennam tandem restaurarunt ampliaruntque Placidia Galla Arcadij & Honorij Imperatorum soror, eiusque filius Valentinianus tertius, vt Blondus asserit.

Quæ autem Flaminia primaria vrbs erat, Metropolis Ecclesiastica facta est, vt apud ^b Zosimum legitur his verbis: [Rauenna Metropolis, Flaminia vrbs primaria.] Vnde fit vt Rauennensis Episcopus semper secundus aut tertius reperiatur, in subscriptionibus 4. 5. & 6. Synodi Romanæ sub Symmacho. Sed quo tempore honore illo insignita fuerit, etiam apud peritiores incertum est. Hunc à Valentiniano tertio accepisse, Hieronymus ^c Rubeus, propensiore eo in patriam studio, quo vel æquissimi interdum feruntur, contendit, vultque Imperatorem illum, Ioannem huius vrbs Episcopum ad honorem Archiepiscopalem euexisse, subiectis ipsius Ecclesiæ sedibus Episcopalibus Emiliae & Flaminia, eique dato priuilegio pallium gerendi Archiepiscopale. Priuilegium quo vult ei gratiam illam concessam esse, ex vetustis membranis, aliquot locis corruptum sic refert. [In nomine Domini Dei Saluatoris nostri Iesu Christi, Fl. Valentinianus fidelis Iesu Christi maior Imp. Aug. Ioanni viro sanctissimo, Archiepiscopo Rauenn. ciuitatis. Si Redemptoris nostri plena pietate dignos suæ maiestatis honorificat Sacerdotes, & chrismatum dona clarificat, quanto magis nos, qui ab eius pietate regalia supra gubernanda suscepimus, cultum religionis & reuerentiæ honorificentius debemus impendere, eis maxime quos virtutum experimento Deo cognoscimus propinquantes: vt inde illis etiam præstet augmentum, vnde eos probabiliter Dei clementia salute impetrare confidimus: ac proinde Imperiali autoritate sancimus, sanctitatem tuam & sanctam tuam Rauennatem Ecclesiam, atque vniuersos postea Deo præfules, Archieratica dignitate erectam Metropolitæ decore sublimandam, seu Archiepiscopali fastigio præponendam. Constituimus sub sacrosanctæ eius Ecclesiæ ditione ordinationem totius Emiliae nostræ prouinciæ, ciuitatum omnium Deo amabilium Episcoporum creationes, id est, Sarsenæ, Cæsennæ, Forum populi, Forum liuij, Fauentia, Forum cornelij, Bononia, Mutina, Regij, Parmæ, Placentia, Brixilli, Vicohabentia, Hadria, omniumque Monasteriorum, sub eius dispositione reiacentium, & in eis seruientium monachorum. Conferentes eis ob decorem Apostolicæ dignitatis honorem pallij, & omnem Pontificalis decoris vsum, sicut cæteri sub nostra Christianissima potestate sæpe degentes, fruuntur Metropolitæ. Condecet enim nos ad honorem Sacerdotis efficaciter propter & maxime vbi serenitatis nostræ præfulget præsentia: quatenus securitate sufful-

^b Zosimus lib. 5.
Ραβέννα μεταβόπλις
Φλαμίνιας πέλις ἀρ-
χαία.

^c Hieron., Rubeus:
lib. 2. hist. Rauenn.